


**Sang President  
Henry B. Eyring**  
Sounsawas Keieu nan  
Presidensi Keieu



# Kompoakapah Loaloapwoat Kan

**E** hu kaping keieu kaselel me Sounkomouro kak ketkihieng kitail iei en malipehkin kitail “kompoakapah kan.” Kitail ese me E ketin poakohng ni unsek koaruhsiehn Sapwellimen Sahn Nanleng serihkan. Ahpw ong irail akan me loaloapwoat nan arail papah Ih, E ketin kolokol mwahr tohrohr wet. Kumwail taman mahsen sang iralaud 84 en Doctrine and Covenants me mahsanih: Oh I pwurehng ndahieng kumwail, kompoakapahi kan, pwe sang met kohla I pahn malipehkin kumwail kompoakapahi, e kesempwal me I kihiehg kumwail kosonned wet, me kumwail wiahla ni duwen kompoakapahi kan nan rahn akan me I mihmi rehail, kokohseli pwehn padahk rongamwahuo sang ni ahi manaman (tehk D&C 84:77).

Kitail pahn wiahla Kempoakepah ni atail pahn papah mehteikan pwehki Ih. E ketin wia karasaras unsek en soangen kompoakapah me kitail en wiahla. E ketin kupwurkihte dah me keieu mwahu ong Sapwellimen Sahn Nanleng serihkan. Arail peren iei Sapwellime peren. E ketin kehn arail pahtou ni duwen pein Sapwellime pwehki Eh ketin pwainehr pweinen diparail kan koaros, aledahng Pein Ih arail soumwahu kan, ketkihsang arail

kahpwal kan, oh kehn arail anahn akan. Sapwellime kahrepe kan mwakelekel unsek. E sohte ketin rapahki kaping ong Pein Ih ahpw en kihiehg kilohri koaros ong Seme Nanleng. Kompoakapah unseko, Sises Kraiss, tohnmetei douluhl ni eh ketin kiskisehki mehteikan peren.

Emenemen kitail me wiadahr inou en pepdais inou-kihier en idawehn Sapwellime karasaras pwehn wahda ahn emenemen wesik kan ni duwen me E pahn ketin wia (tehk Mosiah 18:8).

Nan rahn ekei mwurin met kumwail pahn ahniki ansou mwahu tohto en wia kompoakapah pwehki Ih. E kak wia ansou me komw alialu kohla nan ahl pwelipar. E kak wia ansou me komw mwohndi nan train. E kak wia ansou me komw rapahki wasahn mwohndi nan pokon en Mwomwohdiso. Ma komw kilikilang, komw pahn kilang emen me weuwa wesik toutou. E kakete wia wesik toutou en pahtou de loaloid de likidek. E kak mwein sansal ongete komwi ma komw kapakapki Ngehno en ketikihieng komwi mahs akan en kilenglong nan mohngiong kan oh inoukihier en pwokada peh kan me mwotoudi.

Pasapengpen ahmw kapakap kak en pwerda ni mesen emen kompoakapahn mahs, emen me

ke sohte kilang erein sounpar kei ahpw me ah anahn wiahkintehieu kohdo nan ahmw madamadau oh mohngiong oh ke pehm arail anahn duwhte ma re wia pein ahmw. Met wiawihiengehier. Kompoakapah kan en mahs tehkiehdo mehnda mwail akan oh sounpar akan me ireikitpeseng pwehn kihda arail kangoang ni ansou me Koht kelehpw me kakete mahsen ong irail duwen wesik toutou me I ahniki ansouo.

Soukohp ieias kan en Koht pekihier kitail en wia kompoakapah loaloapwoat ong irail akan me kin kohdohng nan Mwomwohdiso ni arail wia towe kapw oh en kohla doarehla de kapwurehdo irail akan me dohlahr. Kitail kak wia met, oh kitail pahn wia met ma kitail kin tamataman Sounkomouro ansou koaros. Ni atail kin nsenohki kihda sawas oh iang pwokada wesik toutou kan, E kin ketin seweseikitail. E pahn ketin kahluwaikitail ong irail akan me anahn. E pahn ketin kapaikitailda pwe kitail en kak kehn dah me re kehn. Ni atail pahn nannanti nan atail doadoahk en papah irail, kitail pahn ahpwete kin alehdi kisakis en pehmada Sapwellime limpoak ong irail. Met pahn kiheng kitail soupeikasal oh kehlail en kin pwurpwurehng sawas ni loaloapwoat.

Oh, nan erein ansou oh kohkohlahte, kitail pahn kehn peren en kasamwodohng rehn irail akan me wia Sapwellime kompoakapah loaloapwoat. I kapakapki kapai wet ong koaruhsiehn kitail oh ong irail akan me pahn alehdi atail sawas en papah.

---

## PADAPADAHK SANG IREN MAHSEN WET

**T**owe kan en peneinei pahn ahpwete towehda ni katapan ni ansou me pekipek kohieng irail en rapahki mehkot ni arail pahn onopki pwuhk sarawi kan oh mahsen en soukohp akan (tehk *Teaching, No Greater Call* [1999], 55). Ni omw pahn wadek ire wet, peki rehn towe kan en peneinei en kihda tepin padahk kan me pahn sewese irail en warohng malipilipohng wia kompoakapahn Kauno.

*Teaching, No Greater Call* kasalehda: “Ma komw ahniki limpoak duwe limpoak en Krai, komw pahn ahpwete kaunop en padahk rongamwahuo. Komw pahn kamarainda en sewese mehteikan en ese

Sounkomouro oh idawehn lh” (12). Diarada sang nan iren mahsen wet padahk kan me kak seweseikomwi en ahpwete mwahula ni omw wia sounpadahk en ni ihmw. Koasoakiheng iengomwo mepwukat, oh kapakapki oh medewe duwen wia “kompoakapah mehlel” ong irail akan me komw kin papah.

## ME PWULOPWUL KAN

### Emen Me Kapw

Sang Matthew Okabe

**I** kin ahniki ansou apwal ni ahi kin wie pepehm me I pahn sohte kak patehng mehteikan mwahu. Ahi peneinei ahpwetehn kousoando sang apali sahpwet. Ward me se kosoudo loale ahniki pwihn pwulopwul me laud, ahpw met iei ehdin ei pahn wia “emen me kapw.” Me keieu suwed iei me I anahne towe sukuhl kapw, oh madamadau mwadangete kohdo nan moangeie, “Ihs me I pahn mwohd reh ni kommoal en souwas?” Mwein I pahn kilangada emen sang mwomwohdiso, ahpw I sohte men kediroppwe ahn emen tehpel en mwongehn souwas, ni mehlel pwehki ei sohte uhdahn ese ma re pahn mwahuki ien mihmi mwo!

Keieun rahn en sukuhl mwomwen reirei kohkohlahte. Pehl en mwongen souwas kedekedeo sek. Ni ei wawai pidolong nan wasahn mwongeo, I kapakapohng Sahn Nanleng en seweseie diarada emen me I ese. I kilangseli pwe ien kilang ma mie me I pahn kasawiada. Sohte emen. Eri ngehi aluhla lel ni ehuh tehpel dohdihla apali wasahn mwongeo oh kangala kenei mwongeo.

Mwurin mwo ni rahnohte nan perehn kasukuhl ong wahntuhke, I kasawiada emen me I kilangehr mwowe. I kilangehr David nan seminary nihmensengo. E peki ma e kak kilang wasa kan me I koasoandi en mih ie nan ehuehu kilahs rahno oh diarada me kiht koaros kin mwongehn souwas ansoutehkis. “Ei, ke mih ia ni kommoal en souwaso rahn wet?” e nda.

“I mwonge dohdihla ni apali pereh,” I sapengki.

“Na, lakapw kohdo oh mwondi rehi ni kommoal en souwas,” e nda.

I kalahnganki Sahn Nanleng limpoak, me mwangih anahn akan en emenemen kitail oh me kin ketin

sapeng ahn emenemen kitail atail kapakap kan. I kal-ahnganki aramas emen me pwungki oh ngoangki en kapahwei pehn pirien. Mehkot me mengei duwehte luk ehu kak wiahda wekidekla laud ehu.

## SERIHKAN

### Sises Krai, Kompoakapahtail Unsek

**P**resident Eyring mahsaniih me Sises iei kompoakapahtail unsek. Iet kan ekei wiepe kan me Sises kin ketin kasale duwen Eh ketin kompoakapahkin kitail.

E ketin kupwurki me keieu mwahu ong kitail.

E kin ketin kupwurmwahu ni atail kin peren.

E ketin kehn pahtou ni atail kin nsensuwed de medekila.

E ketin lokolongki dipatail kan pwe kitail en kak pwurala rehn Sahn Nanleng.

### Wia Kompoakapah pwehki Sises

President Eyring mahsaniih me kitail kak wiahla kompoakapahn en Sises sang ni wia kompoakapah men ong mehteikan pwehki Ih. Mahleniada kilel kan en wiepe pahieu me komw kak wia kompoakapah men.

Komw kak sewese emen me nsensuwed.

Komw kak wia kompoakapah ong emen me loaloid.

Komw kak luke emen en kohdo sarawi.

Komw kin kak ansou koaros tamataman Sises.



# Kakehlailih Peneinei Kan oh Nan Ihmw Kan

*Onopiki iren mahsen wet, oh ni duwen me konehng, koasoakiheng riatail lih akan me komw kin pwarek. Doadoahngki peidek kan pwehn seweseikomwi kakehlailih riatail lih akan oh wiahda Pwihn en Sawas en Lih en wia kish eh mehleh en pein ahmw mour.*

## **Sang Pwuhk Sarawi Kan:**

Senesis 18:19; Mosiah 4:15; D&C 93:40; Moses 6:55–58

## **Kakehlail ni Ansou Mwahu Koaros**

“Emenemen kitail mihmi nan irair en peneinei me wekpeseng. Ekei peneinei kan mie nohno oh pahpa iangahki seri ni ihmw. Ekei pwopwoud kan sohlahr mie neirail seri ni ihmw. Tohto tohn Mwomwohdiso sohte pwopwoud, oh ekei wia nohno de pahpa me kelehpw apwawpwalih seri. Mehteikan iei lihodi de olohdi kan me kekelehpw.

“Sohte lipilipil mwohmw en atail peneinei, emenemen kitail kak doadoahk pwehn kakehlailih pein atail peneinei kan de sawas kakehlailih mehteikan.

“[Ehu pako] I mihmi nan imwen nein riei oh ah peneinei. Nihisoutiko mwohn serihko ahr kohla meir, se wia soutik en peneinei mwoto-mwot oh koasoaihda oapwot soai sang nan pwuhk sarawi. Arail pahpao koasoia duwen peneinei en Lehi oh duwen eh padahkihieng nah serihkan me re anahne koledi teng sahl meteo, me iei mahsen en Koht. Kolokol teng sahl meteo pahn sileiraildi oh kahreirail ong popohl oh peren. Ma re pahn kadarala sahl meteo, mie keperpen duhla nan pillap en pihl samin.

“Pwehn kasalehda met ong nah serihkan, arail nohnohu wia ‘sahl mete’ me re anahne koledi teng, oh arail pahpao kamwomwehda tepel, songosong en apihasang serihkan sang nan wasahn keiru oh peren. Serihkan pereniki soaio oh esehla duwen kesempwalpen kolokol teng sahl meteo. Mwurin soaipwoato sang nan pwuhk sarawi e wia ansou en kapakap en peneinei. . . .

“Pwuhk sarawi kan, soutik en peneinei, oh kapakap en peneinei pahn kakehlailih peneinei kan.

Kitail anahne alehda ansou mwahu koaros en kakehlailih peneinei kan oh utung emenemen en mihmi pohn ahl pwungo.”<sup>1</sup>

*Barbara Thompson, sounsawas keriau nan presidensi lap en Pwihn en Sawas en Lih.*

## **Sang Atail Poadoapoad**

Sangete ni tapio Pwihn en Sawas en Lih pwukoahki kakehlailih peneinei kan oh ni ihmw. Soukohp Joseph padahkihieng riatail lih akan ni ehu mihting en tepin Pwihn en Sawas en Lih, “Ni amwail pahn kohla nihmwamwail kan, dehrpahte kiheng amwail pwoud kan lokaia lingeringer de lemei, ahpw mweidehng, limpoak unsek oh limpoak en kamwaramwaruh amwail doadoahk kan sang met kohla.”<sup>2</sup>

Nan 1914 President Joseph F.

Smith padahkihieng riatail lih akan nan Pwihn en Sawas en Lih, “Sohte lipilipil wasa me mie rotorot de souitar en wehwe me pid peneinei, . . . wasao pwihn wet mie de keren, oh sang ni kapai kan oh kamarain kan me uhdahn wia kishen pwihn wet re kaunopehr oh onop en kihda kaweid me doke doadoahk kesempwal pwuko.”<sup>3</sup>

## **IREN SAWAS AKAN**

1. Barbara Thompson, “His Arm Is Sufficient,” *Liahona*, Mei 2009, 84.
2. *Teachings of Presidents of the Church: Joseph Smith* (2007), 482.
3. *Teachings of Presidents of the Church: Joseph F. Smith* (1998), 186.

## **Dah Me Kitail Kak Wia?**

1. Iren madamadau dah ong kakehlailih peneinei oh ni ihmw me komw pahn ehukiheng riatail lih akan? Ni omw pahn medewe irair kan me emenemen mih loale, Ngehno kak wahdo iren madamadau kan nan omw madamadau.
2. Irair kesempwal dah me komw kak wekidala nan sounpwong wet pwehn kakehlailih pein ahmw peneinei oh imwomw?

Ong mehn kapehse kapatapat, tehk [www.reliefsociety.lds.org](http://www.reliefsociety.lds.org).

© 2010 sang Intellectual Reserve, Inc. Kolokol pwuhng koaros. Ntingda nan USA. Kamanaman ong lokaiahn wai: 6/09. Kamanaman ong kawehwe: 6/09. Kawehwehen *Visiting Teaching Message, July 2010*. Pohnpeian. 09367 885